

NAQQIUT

(Qulequtaani tunngavilersuutaanilu naqqiuteqarpoq)

16. april 2019

UPA 2019/154

Inatsisartut suleriaasianni §33 naapertorlugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut aalisarnermut akuersissutit kommuninit tamakkiisumk ingerlanneqalissasut.

(Inatsisartunut ilaasortaq, Henrik Fleischer, Siumut)

Tunngavilersuineq:

Piniarneq aalisarnerlu kinguaariinni arlalinni kulturitsinni pigisimassavarput tamannalu akornutigiginagu piuaannartitsinissaq ilungersorluta sakkugissavarput. Naalakkersuisut UKA16/123 aalajangiunneqarmat peqquneqarpoq aalisarnermik akuersissutit suliarineqartarnerat kommuninut nuussorneqassasut. §37 naapertorlugu apeqquteqaatiga nr. 63/19 takutippaa suliassap ilaannakoortumik nuussorneqarsimasoq. Tamaattumik kissaatigaara, aalisarnermik akuersissutinut suliassaasut suli Naalakkersuisuni sinneqarsimappata, kommunenut nuussorneqassasut.

Akuersissutinik tunioraanagerup kommunenut nuussorneqarpata najukkami pissutsit suliassami aallaaviunerulissapput, tamannalu kingunerissavaa aalisarnikkut inuussutissarsiornerup suli sullinneqarluarnerulernissaa. Aalisarnermik inuussutissarsiortut akimmeffeqaratik sulisinnaasariaqarput.

Aalisarnermik piniarnermillu tunngaveqarluni inuussutissarsiorneq piuaannartissagutsigu, taava ilanngullugu aamma nunaqqatitta ilinniarnermik aallutaqarsimasut suliffeqartullu eqqarsaatigisariaqarpavut. Taakumi aamma kivitseqataammata piniarnermik aalisarnermillu kulturitta napatittuarnissaannut.

Aalisarnermik akuersissutit inuussutissarsiuugalugu aalisartunut tunniunneqareerpata, taava saniatigooralugu aalisartuusut aamma akuersissutinik tunineqassapput. Sunngiffimmi aalisartut tassaapput nammineq atugassaminnik aalisartut.

Nunarput siulitsinniik kingornussarivarput, taamaattumik pisussaaffigaarput imatut aaqqissussallugu Nunatta inuisa inooriaasiannut naleqqussartuassallugu.

Aningaasaqarnikkut allaffissornikkullu pisortanut sunniutissaa:

§37 najoqqutaralugu nr. 63/2019-ip akissuteqaataani takuneqarsinnaavoq kommunenut tapiissutit (kommunalt bloktilskud) allanngornerisa taamaallaat akuersissutit suliassartaasa ilaanakoortumik nuussornissaannut aningaasaliissutaasut, illuatungaanilu UKA /123-mi aningaasatigut kingunerisassai tassaallutik suliassap tamakkiisumik tunniunneqarnissaa. Taamatut tunngaviliininni ilimanarsivoq siunnersuutigineqartoq akuersissutigineqassappat taava 0,5 – 1 mio Aalisarnermut, Piniarnermut Nunaateqarfimmullu Departement-imi sipaarneqarsinnaassasoq.

Allannguinermi paatsuunganarsinnaasut atuisunut tutsinneqannginissaat siunertaralugu allaffissornikkut aningaasartuuteqariataarsinnaaneq 100-150.000 kr. tungaanut ilanngunneqarsimanersut takuneqarsinnaanngilaq, taamatuttaaq ataaseriaannarluni aningaasartuutigissamaakkat 1,3 mio., UKA16/123-imut qaffassutaallutik ilaareernersut, Naalakkersuisut §37-imut apeqquteqaatima akissutaani nalorninarpoq ilanngutereersimaneeraat.

Namminersortunut aningaasaqarnikkut allaffissornikkullu sunniutissai:

Siunnersuutip siunniussaa tassaavoq aalisarnermi inuussutissarsiortut aalisarnermut akuersissutinik piniarnissaat najukkaminni periarfissarinnerulernissaat. Nalilersuinermi illuatungeriinnut tamanut ajornannginnerusumik ingerlanneqalernissaa ilimanarmat. Siunnersuut toqqaannartumik namminersortunut sunniuteqassasoq ilimananngilaq.

Innuttaasunut aningaasaqarnikkut allaffissornikkullu sunniutissai

Soqanngilaq.